

韓忠獻公遺事
豐清敏公遺事
崔清獻公言行錄



崔清獻公言行錄

李肖龍
撰

中華書局

叢書集成初編

韓忠獻公遺事（及其他二種）

中華書局出版發行

（北京王府井大街三十六號）

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之一

統一書號：一七〇一八·一五一

崔清獻公言行錄卷一

宋 增城李肖龍叔膺撰

公諱輿之字正子。其先汴人。紹熙庚戌補太學生。癸丑登進士乙科。爲漳州司法。再調淮西檢法格。知建昌軍新城縣。通判邕州。知賓州。提點廣西路刑獄。兼提舉河渠常平事。召除金部員外郎。嘉定甲戌以直寶謨閣。帥淮東。就任。加龍圖閣將作監。太府少卿。己卯冬召入。除祕書監。兼太子侍講。庚辰春擢權工部侍郎。兼國史實錄院同脩撰。四月以煥章閣待制。帥成都。辛巳冬權四川宣撫使。因以爲安撫制置使。兼知成都府。甲申丐祠。以權禮部尙書召。力辭。歸田里。理宗登極。除顯謨閣學士。起以湖南帥。辭不赴。遂辭煥章閣學士。提舉鴻慶宮。紹定己丑復除徽猷閣學士。起以江西帥。翼其便道趨朝。又辭。不赴。乞致仕。不許。端平甲午除吏部尙書。不起。拜端明殿學士。提舉崇福宮。乙未三月以廣州軍變。除廣東路經略安撫使。兼知廣州。六月事定。卽召代拜參知政事。七辭不起。除資政殿學士。提舉洞霄宮。丙申年拜右丞相。兼樞密使。十三疏辭。不許。嘉熙戊戌始得請。改觀文殿大學士。宮觀如前。己亥以觀文殿學士致仕。與宰臣恩例。十一月以疾薨。年八十有二。贈太師。諡清獻。累爵南海郡開國公。母夫人羅氏露坐。有星墮懷妊而生。公幼名星郎。及壯補上庠。初參齋。或夜夢有烏龍蜿蜒盆中。翌旦公適至。盥於盆。聞者異之。行在太學觀齋碑公蚤孤。家貧。刻苦向學。讀書務通大義。不事章句。爲文務得大體。不事綴緝。少儻有大志。應接事物。動有機警。初任漳州法掾。部使者巡按壓境。驛治久圯。郡委督辦甚峻。瓦無所取。公命吏以次易靡瓦覆之。

倉卒完集。在淮西幕時。王樞密當國。有子豪奪僧寺田。官吏無敢決其訟。公直筆擬斷。不爲權勢屈。王聞而壯之。薦於朝。由是諸臺交刺爭致。家集有謝王樞密啓

治新城。以撫字寓之。催科酌道里爲信限。悉蠲浮費。民輸直造庭下。東廡交錢。西廡給鈔。未納無泛比。已納無泛追。不事一筭。而賦益辦。前是編民以役破家相踵。公旣去。所以遣役者。民爭應恐後。會歲祲。舉行荒政。供億軍需。無窘蹙峻迫狀。邑境帖然。當路取其規畫。下諸州縣倣行之。上其治行。家集見辭在內陞邕州未赴。特旨與在內陞擢差遣。公力辭竟之本任。識者高其有難進之風。家集

倅邕未基。適賓州軍閔。諸臺以公長於應變。列辟賓守。其折姦萌。不動聲色。憲使楊公方爲時名流。按部至賓。見公處事識大體。愛民有實惠。期以經濟事業。諸郡邑獄訟久不決者。悉歸之。剖決如神。一道稱快。遂特薦之。家集見謝賓州啓

守賓年餘。除本路憲使。誥云。爾分符未久。治有休聲。茲予命汝持節於本道。豈徒爲爾寵哉。以爾習知風土之宜。則廣右之民有所未便。及所願欲而不得者。皆可以罷行之。公益自奮厲。以爲嶺右去天遠甚。官吏任情摧剝。須澄清之。視事日。首榜所屬。明示要束。吏姦民瘼。纖悉畢載。號令明肅。觀者懼焉。以公擊搏不避權勢。貪污之徒。有望風解印綬去者。其榜一曰。獄囚充斥之弊。二曰。鞠勘不法之弊。三曰。死囚冤枉之弊。四曰。贓物供攤之弊。五曰。戶長科役不均。六曰。弓手土軍騷擾。七曰。催科泛追。八曰。緝捕生事。九曰。姦猾健訟。十曰。州縣病民等事。後真守高惟肖。廣舶趙汝楷。見之。服爲吏師。梓行於世。家集

公道經連州時。官民耆儒迎謁於州治。將行。因書曰。有才者固難得。苟無德以將之。反爲累爾。窮達自有定分。枉道以求之。徒喪所守。州人以爲名言。刻於石。

公爲廣西憲。欲渡海決囚。吏人云。海濱有神最靈。若欲渡海。須預決於神。不然。鮮克有濟。公曰。海外諸州官吏。不法久矣。我欲爲民除害。豈問神耶。遂理舟渡海。離岸。方頃間。風濤大作。舵爲之折。公亦不禱於神。回舟。整舵以行。諸吏畏恐。公乃就舟中陰禱於天。須臾。天色開霽。風浪帖息。及至海。劾四郡貪黠吏數人。自此官吏始知有國法。不敢害民矣。至今海外立公祠堂。歲時祀公不絕。亦公恤民一念。上通於天故也。廣人集公政迹。爲嶺海澄清錄。

廣右境土荒寬。四州又越海外。昔者輶車按行之所不到。公歷巡所部。朝嵐晝暑。星行露宿。以葉舟渡朱崖。衝冒川途之險。而弗顧。自春徂冬。往返數千里。形容凋瘵。鬢毛悉斑。所至褰帷問俗。導人使言。有條利害以告者。必爲之罷行。乃去。幽枉之民。遮車而赴愬者。駢肩叠迹於道。家集

嘉定七年。金主爲韃靼所攻。棄燕來。汴。李全復據京東。兩淮腹背受敵。命公帥淮左。陛辭。首疏以選擇守將。招集民兵爲第一事。別疏略曰。金虜垂亡。惟定規模。以俟可乘之機。最是要務。山東新附。置之內地。如抱虎枕蛟。急須處置。自古召外兵以集事。事成與否。皆有後憂。當來若欲招納。合計爲兵若干。錢穀若何。而倚辦。爲農若干。田牛若何。而措畫。今既來之。無以安之。使繼餒於我土地。及其隄犯。又無控御之術。幾至稔禍。事勢如此。只得因病處方。無徒以受病之源。歸咎既往。乞下制司區處。要使命令一出。帖耳退聽。

家

守揚州登城臨眺形勢謂濠河陜陜褻裳可涉守禦非宜乃度遠近準高下程廣狹量深淺爲圖請於朝許之河面闊十有六丈底殺其半深五分廣之一環繞三千五百四十一丈壕外餘三丈護以旱溝又外三丈封積土以限淋漓又廣地七丈以受土使與危堞不相陵復作業城五門爲月河總百十七丈而南爲裏河又八十七丈西北曰堡城寨周九里十六步相去餘二里屬以夾城如蜂腰地所必守左右尤淺隘凌之概如州城壕計七百三十一丈且甃女牆以壯其勢外壕既深水勢趨下市河涸不可舟有警芻餉難爲力又加深廣造輿梁五經始於八年八月訖於九年九月工一百一十五萬四百二十五費朝家緡錢三十四萬八千七百五十六米石二萬一千八百四十七州家激犒爲緡錢五萬一千六百節縮有道勸懲有章公私不以爲病

揚州重脩城壕記

沿城外羊馬牆內環植柳樹官軍多以小枝應數公出鎚責將校募諸營選大如臂者培植長茂周遭六萬一千五百餘株二三年後小者可爲薪大可爲樅木留根四尺槎牙交錯禁限工具春至復生

家集

家集

揚州倉廩少且圯壞新糴無所放處公視北門內舊柴場地於市河爲近鼎剏倉廩十二座積粟充裕

備禦之計人患兵少公獨以兵不在多在素練耳以諸軍分作三等教閱弩手以年力高強而善射者爲上挽踏施放合格者爲中餘爲下鎗手以身材及等仗而有膂力者爲上雖不及等仗而少壯善擊刺者爲中餘爲下騎兵則以人騎輕捷武技精熟爲高下先布陣勢縱橫來往用草棒相擊以習刀法或用包

頭種鎗馳逐格刺以習鎗法然後大走馬圓射用拒馬圍隔射垛至四十步施放三箭來往四遭精熟又加步數五日起州治教場閱習委幕僚督視籍中否優劣月終比較賞罰則親按激勸練習既久上等出等中等爲上下等爲中人皆可用戰則上等居前鋒中等佐之守則上等當衝要中等助之下等供戰守雜役遇敵戰勝賞亦有差仍下諸州縣屯戍一體行之由是淮東軍聲大振集家

諸屯軍馬歲例九月後三十八日壓馬出城三十里回習爲文具公至始剏簽牌分寫八卦如探得乾字卽令旗頭舉乾卦旗出北門將校率羣騎視所向以往遇岡坡溝澗徑趨直前不令迂繞取道使人馬相遇險不懼緩急可恃爲用集家

淮東數百里皆夷曠惟滁州盱眙軍多山林方山石固山嘉輔礪崖高峙上有泉源公募民築五山寨累石爲城料簡丁壯選材力服衆者假以官資統之月差一百二十五人分布守望官支銀四百一十貫米七十五石有警邊民悉家於中併力捍禦又慮姦民乘時剽掠以路鈴劉詵老成忠義用爲五寨都總轄鎮壓之集家

淮郡有萬弩社公謂追襲邀擊騎射爲優遂請於朝乞於本路屬邑更剏萬馬社募淮民爲之縣額百人應募者閱試合格官助鞍轡錢二十千人復租稅三百畝平時故在田里緩急調用仍選材智出衆者統之集家

浙東大饑流民渡淮求活以數千計公命僚屬於南門外籍口給錢米民得無饑亂以死無不感慕且請

於朝行之。兩淮端明洪公咨夔嘗有詩曰。塞下人家盎盎春。又推餘澤及流民。廬州小范青州富。合作先生社稷身。

洪平齋文集

廟堂貽書欲主和議。公答曰。古今未有無夷狄之中國。而中國所恃以待夷狄者。不過戰守和三事而已。唯能固守。而後可以戰。可以以和。權在我也。守且不固。遂易戰而爲和。權在彼也。自大將屯重兵於山城。孤絕之地。而淮東守禦全勢。因此大壞。局面一差。著著費力。彼方得勢。而我與和。必遭屈辱。況虜寇尙留吾境。敵情多詐。從違未足深信。徒使軍情疑貳。邊防縱弛。必爲所誤。犬羊貪狼之性。非其力屈未易和也。今招信之寇雖未退。而五山寨錯落相望。邊民米麥盡數在砦。野無所掠。其勢只得攻青平山。又復失利而去。統制陳世雄等軍分頭頓兵。關集山砦。併力勦逐。其勢必不能久駐。又淮陰之寇楚州已遣季先所部忠義人前去迎擊。敗之。更看事勢如何。且如東海漣水。爲我所有。山東歸順之徒。爲我所用。一旦議和。則漣海二邑若爲區處。山東諸酋若爲頓放。蕭牆之禍。必甚於顓臾。和未可遽言也。比因繆將喪師辱國。憤恨俱廢寢食。心氣大作。委無精力。可以應酬。乞別差通敏者。以任和議之責。

家集

虜哀小舟渡淮。爲官軍驚遁。報至。公曰。虜性多詐。強則示弱。弱則示強。今來衰殘。恐我遣師。故爲虛喝耳。遂移文戍軍。仰預行體探。密作隄備。以俟其來。併力勦殺。毋容一人一騎脫去。後濱頭果告警。俘馘幾盡。

家集

崔清獻公言行錄卷二

淮陰寶應滁州築城浚壕措置守禦官軍勞苦公委官相視激賞費交子六萬貫悉自撙節不請科降家集

楚州青河口寇所必趨無險可恃遇警敵於對岸覘我軍虛實瞭然在目若乘虛伺困奔衝而來不戰自潰公乃築城置戍可守可戰申請乞置副都統於楚州以總內外之兵於是山陽淮陰如常山蛇家集

盱眙屯重兵雖臨以大將而有外實內虛之勢公白廟堂曰用兵如弈棋置子雖疎取勢欲接旁角失勢腹心勝之今局面似少差使智者臨枰不過急於求活萬一敵以疑兵牽制盱眙以勁兵由他道而來則孤城隔絕於外將有腹背之憂豈能涉遠相援乞移大將近裏以養威卻於統制官中選智勇可當一面者總戍山城蓋滁與盱眙距天長各百三十里大將駐天長虎視四郊則臨機隨勢策應出入變化不爲敵所窺而淮東備禦之勢全矣家集

時廟堂以張皇爲戒公上劄言守邊以鎮靜爲先以張皇爲戒古今之通論也然事勢有萌猶戒張皇備禦未周徒爲鎮靜識者隱憂謀聞燕山已立新主韃靼又復交攻山東乘虛寇之亦甚蹙迫然且簽刷軍馬敷料糧草屯海州屯清河屯招信濠梁此其意向可疑彼境之人皆言其垂涎歲費不得欲以兵脅取豈容無備如滁州合整輯關隘以爲障蔽盱眙合措置山砦以爲聲援楚州合經理清河口守把淮口以

爲控扼。輪日教閱。激作士氣。常時戒嚴。以守爲戰。非惟緩急不致誤事。亦可集事。家集

八

制司密遣劉璋等渡淮攻泗州。全軍敗覆。公慮虜兵乘勝衝突。亟遣強勇馬軍百騎。星馳盱眙沿淮一帶巡哨。官給鎧仗。及紅綠白布馬衫各百領。併諸色旗幟。令其隨處換易。晝夜往來。莫測出沒。或多或少。或分或散。遇平野則馳騁打圍。移文州縣。卻稱分頭遣去五百騎巡邊。又慮盱眙山城孤立。積穀九萬餘石。及鎮江揚州。節次搬去攻守之具甚多。亟選精銳軍三千人。厚加激犒。星夜馳去捍禦。又慮朝廷憂顧。以書馳報曰。天長盱眙等處。各已增戍。雖無舟師。已密令將在淮馬船牢守。恐爲羊皮軍所襲。彼若車運小舟渡師。卽是送死。可報東門之役。彼若措置大舟。亦非旬日可辦。則備禦大略已成。倫序矣。盱眙添到策應軍五千餘。併收拾散亡。共可及萬人。內揚州撥去敢戰精銳二千八百人。皆平時素練之士。儘可爲用。事已至此。只得隨機應之。願寬懷抱。家集

泗州盧鼓椎遣殺降旗軍七人。送歸南岸。告之曰。盧元帥不殺降兵。公謂我青面軍。彼所忌也。故設計誘之以離其心。意其力耳。卽貽書劉都統曰。官軍渡淮攻戰。自合奮不顧身。今已降虜。又復來歸。須從軍法。以沮賊謀。以固士心。家集

楚州武鋒敢勇旗軍王勝等一百餘人。搶奪寨門。帶器甲逃去。入射陽湖。從者益衆。公卽下諸處牢固守禦。又慮蔓不可圖。遣將官李椿。齎旗榜往諭之。軍衆各稱揚州安撫恤軍愛民。願聽招諭。王勝懷疑。令溫富徙往招提寺別寨固守。及降。公摘王勝溫富誅之。餘悉蠲罪。分隸諸戍。家集

公除祕監。丐祠。不許。舟次池口。得報。江淮宣撫使辟充參謀。公謂除命在前。辟命在後。雖未被受。然已報行。況今殘虜寇邊。義當體國。只合申審。乞免造朝。以就宣幕。遂移京口。聽候指揮。尋有旨令入奏。方回棹赴闕。首奏。臣自外來。但知外患未息之爲可憂。致身內地。始知內治未立之爲可慮。蓋內外之情不通。最爲今日大患。人才之進退。言路之通塞。國勢之安危。係焉用人。必親其人。聽言必行其言。事之巨細。必有良規。而後可以獨運。事之利害。必有真見。而後可以獨斷。願於用人聽言之際。一付公論。詔大臣首清中書之務。力爲外禦之圖。延接諸賢。參稽衆論。凡大施設。大經畫。合謀而參訂之。以求至當之歸。奏

廷對劄子言立國之道。在謹邊備。以爲藩籬。安人心。以爲根本。根本固。則藩籬壯。乞行下江淮制置司。應淮郡尙有賊盜去處。亟作措置。務要綏靜。俾民復業。爲國強邊。又乞弊勘極邊。曾經盜賊戎馬侵擾去處。稍加寬恤。去年殘欠。且與開豁。今年夏春。或免或減。等第施行。務有以係其心。寬其力。不惟可以實邊。緩急可以爲官軍聲援。奏

又奏。事功之不立。由意嚮之不明。意嚮之不明。由規模之不定。殘虜雖微。窮獸必搏。要汲汲自治以待之。乘釁一動。收功萬全。臣昨乘障五年。力持守禦一說。始終不變。毀言日至。不遑恤也。有爲進取之舉者。臣知其必不利。又有爲議和之說者。臣亦斷以爲不可行。既而竟如所料。今虜退三閱月。朝廷幸目前之暫安。寢不經意。邊臣日上平安之報。而不言禦備之方。正恐不待秋高。邊塵已聳。必有潰裂四出之患。乞行下江淮制置司。安撫司。軍帥。邊守。凡有城壁去處。各仰開具。逐處見管官軍若干。民兵若干。屯駐大軍若

干椿積米麥草料若干。城池關隘有無疎略。合作如何。賞理。戰守器具。有無缺少。合作如何。措置。軍儲馬料。柴草之類。有無匱乏。合作如何。辦集。遇風塵之警。若爲捍禦。若爲應援。若爲制勝。各從實具申。樞密院詳酌施行。山東忠義。仰節制司開具實管人數若干。已收刺若干。揀退若干。見安頓於何地。統御以何人。今欲分作幾屯。防秋在即。寨宇卒未成就。合作如何。料理。今欲立爲幾軍。其制領正副將以下。合作如何。區處。逐一條具申上。其間有合商確事件。庶幾豫爲之圖。毋致臨期誤事。美

時論謂直言爲好名。公奏人才國之元氣。進退消長之機。乃治亂安危之候。涵養元氣。而壽其脈。有國者所當加意。而人才之消長。由士氣之屈伸。士氣之屈伸。由言路之通塞。彼其不敢昌言於公朝。而隱憂於私室。不敢明告於君父之前。而竊議於朋友之間。非盛世所宜有也。美

公奏對開。一日。上問鄉里有何人才。公薦吳純臣有監司之才。遂除廣西憲。溫若春宜清要之任。遂除祕書郎。後皆稱職。

爲講官時。說漢書二節。是前人無此發明。一云。漢文帝君臣不學。卽位初。元首以獄刑錢穀問周勃。勃謝不知。問平。平舉大體以對。惜乎文帝不學。不能舉周事以詰平。周以冢宰。通三年而制國用。以八法而平邦國。非留意獄刑錢穀乎。以此詰平。知其無以藉口矣。二云。周亞夫執鞅非少主臣。此是亞夫強項氣習。細柳之屯。去中都不遠。閉營門以拒天子。謂之警不虞則可。而尊君之禮則未至也。景帝忌刻。宜其不能容。孔子論爲臣。則曰。其行己也恭。其事上也敬。亞夫不學。毋怪乎恭敬之事未之有聞。會就

某奏

嘉定十三年四月。出帥成都。是時二虜交攻。往來寇蜀。益都謀帥難其人。故有是命。公奉天下之事。須要中外相應。大小相維。而後有濟。蓋中外當如一家。貧富休戚。實同其責。而勢不可不相屬。大小當如一體。疾痛痒疴。皆切於身。而情不可不相孚。臣螻蟻無援。孤立萬里外。設或中外勢不相屬。大小情不相孚。以致誤事。一身獲戾。何足深計。而事體關係利害匪輕。內引復奏。實邊而後可以安邊。富國而後可以強國。竊聞軍興以來。帑庾告竭。設若有警。搏手無策。而後有請于朝。恐無及矣。臣區區此行。職所當爲。義有可爲。誓當糜捐以圖報稱。不敢爲身計。至於廣科撥以寬民力。厚儲積以壯邊聲。陛下當爲蜀計。上嘉納之。

十四年十一月。宣撫使安公丙薨。宣司奉印來歸。軍民屬望公權宜納之。以安反側。亟聞于朝。繼得旨。權宜撫職事。十二月。除四川路安撫制置使。先是有日者。在大慈寺見公。語幕客平齋洪公曰。帥嶺南古佛。西蜀福星也。至節前後當度劔。時宣開猶無恙。已而如其言。

公嘗題劔閣云。萬里雲間戍。立馬劔門關。亂山極目無際。直北是長安。人苦百年塗炭。鬼哭三邊鋒鏑。天道久應還。手寫留屯奏。炯炯寸心丹。對青燈。搔白髮。漏聲殘。老來勳業未就。妨卻一身閑。梅嶺綠陰青子。蒲澗清泉白石。怪我舊盟寒。烽火平安夜。歸夢到家山。

公每謂士大夫處同僚。常因小憤。而誤國家大事。由不能勝己私。治客氣。故帥淮時。嘗奏名位相統屬。而勢不合。文移相關白。而情不通。聲色笑貌相周旋。而意不叶。事鮮有濟。及之蜀。亦以內外一家。大小一體。

爲對。

公任蜀閫。適邊戍久不解甲。總計告乏秋糴。是時主計者茫然。公卽下成都府。撥三十萬錢引爲倡。仍騰茶馬司。撥三十萬。三路漕司。各撥二十萬。潼川。遂寧。漢州。各撥一十萬。接濟總所急缺。乘時糴買。以備來歲支遣。且申朝廷將上項錢理作科降。自昔用蜀。每病運漕之難。蓋蜀地僻遠。灘流險絕。每一綱運。動歷半期。且有沈折之患。成都苗頭歲十五萬石。舊及十萬。卽折輸以實私囊。鮮有爲公家計者。公自庚辰冬到官。留意軍儲。並收正色。二三年間。所積頓厚。壬午秋。省倉見管二十九萬餘石。歲支有餘。遂撥十萬石。優立賞格。選官津運至利沔魚關等處安頓。以充朝廷椿積之數。通計舊糴三十餘萬石。專備經常外不測支用。家集

公身藩翰而心王室。務薦賢以報國。在蜀擢拔尤多。若游似。洪咨夔。魏了翁。李庭芝。家大酉。陳韓。劉克莊。李鼎。程公許。黎伯登。李性傳。王辰應。王湜。魏文翁。高稼。丁煇。家抑。張裨。度正。王子申。程德隆。郭正孫。蘇植。黃中。高泰叔。李錫。各以道德文學功名。表表于世。隆州進士李心傳。累舉不第。以文行聞于國。諸經皆有論著。尤精史學。嘗著高宗繫年錄。號詳治。國史院取其書備檢討。又纂集隆興乾道淳熙典章。及著泰定錄等書。以白衣召入史館。亦公特薦。家集

公在蜀省費薄斂。公私裕如。將去。舉羨餘三十萬緡。歸之有司。以佐邊用。一無私焉。代者輒乾沒。虜攻三關。調度無以繼。仕於蜀者。鮮不爲奇玉美錦所動。公至官。爭以爲饋。悉卻之。去之日。至蜀口。四路制領。舉

所嘗卻者以獻有加焉。俗謂之大送。公卻愈力。

公至成都時。安公丙以執政任宣闢。夏人書來約夾攻。公聞之。亟致書安公曰。自金虜棄燕。山東兩河。勢如破竹。滅亡可待。異時震鄰之患。大有可憂。金人不顧死亡。南窺淮漢。宜及此時招納豪傑。選將練兵。脩固堡障。以待蜀連年被兵。士氣未振。豈宜輕舉。彼區區西夏。衰微益甚。何足爲吾之掎角。萬一失利。虧損國威。公必悔之。其年師出攻秦鞏二州。不克。夏人先退。大將王仕信以逗撓伏誅。果如公言。安公深相敬服。又關外四州。蜀之扞蔽。中興二吳。百戰死守。和尚原仙人大散關之地。公權宜撫兼制置。申明賞罰。措置有方。首擊尾應。敵不敢犯。及丐閑。史相以其黨鄭損代。至議棄四州地。於是劍門之險與虜共矣。累朝所有激賞庫金。席卷以遺。權貴鄭雖以此得罪。國家首蜀尾淮。上流失勢。漸不可支。蜀士夫流離出峽。言之必流涕。或云禁中時時撫髀興嘆。其後命余玠經復。迄無成功。惜哉。虜虜楊汪中

理宗登極。以湖南帥召不起。繼召以江西帥。又不起。端平初。又除吏部尚書。亦不起。力請休致。乙未二月。循梅戍軍會忠等回。由惠城倡亂。徑擣廣州。主將熊喬脫歸告變。庾使黃晟等以一郡生靈。係命於公。請登陴撫諭。公爲惻然。亟偕往。詰其故。叛卒一見。羅拜城下。以賊平久不得撤戍爲對。公遂召祕著李公昂英。節推楊公汪中。絕城諭賊。曉以逆順。許之自新。賊始引去。公授諸臺。嚴爲備禦。檄摧鋒統制毗富道會諸戍將追擊之。宋集

叛卒初抵城。薄北門。摧鋒本寨纔一壁隔。人心憂危。懼生內變。公與庾使黃公議。開府庫。大犒諸軍。令熊

喬回本寨鎮壓密護北門。區處有方。關防甚備。時軍氣頗驕。大肆剽掠。擇其尤無良者誅之。於是帖息。民恃亡恐。家集

變聞于朝。三月。除公廣帥。始賊自廣遁去。趨肇慶郡境。招納亡命。從者響應。勢益張。入據府城。官軍進擊。賊棄城潛遁去。盤礪四會懷集間。郡邑洶洶。公不敢辭。即家治事。家集

賊自懷集。迤邐入封州境。山徑險峻。不可追擊。公亟與憲使彭公鉉。遣將調兵。四面圍襲。氣勢翕合。賊屢戰北窮。蹙來歸。公以徒分隸諸軍。悉殲之。家集

寇平。即力辭闕事。所得廣帥月廩錢一萬一千餘緡。米二千八百餘石。悉歸于官。一無所受。家集

端平二年閏七月。拜參知政事。五辭。凡七曰。臣之事君。死生唯命。此古今不易之大義也。避事者或偷情

以自便。沽名者或矯激以爲高。方命之誅。皆所不貸。至如年齡已邁。疾疢已深。任重力綿。不容勉強。則情可憫。罪可寬也。伏念臣忠恪一心。率奉體國。頃年筋力未衰。東淮西蜀。萬里奔馳。才雖不逮。而力可往。未始辭難。至於驚力既窮。不堪鞭策。雖長沙南昌。分闕之寄。相去非遙。亦不能往。陞伏里居。十有二年矣。陛下垂憐舊物。未忍棄捐。擢之政途。急於圖任。何物衰遲。誤蒙簡知。如此趣行有命。但切震驚。實是氣體支離。不能拜跪。何以趨進班行。久病喪心。施爲顛倒。何以應酬事機。況髮駸八十歲之陳人。爲迢迢數千里之遠役。能免顛仆於道路乎。茲累疏連章之有請。而真情實意之未孚。目斷天高。辭窮莫措。惟俛首窮閭。凜凜俟譴而已。夫以一介螻蟻之微。敢於屢犯雷霆之威。豈得已哉。伏望聖慈。念臣衰殘。俾遂乞骸之願。